



ITA “PRIMEREAR”

Maski selebrasaun ba Bisentenariu hotu ona, Dom Bosco kontinuala’o hamutuk ho ita iha tempu ida ne’e.

Kreda dedika fulan outubru ba misaun sira no ba Na’in Feto; tinan tinan Amo Papa haruka mensajen ida ba sarani hotu, atu bele reflete kona-ba realidade misaun nian. Tinan ida ne’e, Amo papa fó hanoin ba Kreda iha mundu rai-klaran katak misaun hahú husi sira ne’ebé kiak no ki’ik. Ita moris iha sosiedade iha ne’ebé maioria mak foin-sa’e ka labarik, maibé mós ita bele hetan ema kiak barak. Tan ne’e, importante liafuan ne’ebé haree iha titulu: Amo Papa Francisco mak inventa liafuan ida ne’e: katak foti inisiativa, ba uluk. Iha fulan outubru (maibé mós novembru), ita hakarak tulun oratorianu sira atu uza sira-nia talentu ba Maromak nia Reinu.

IKONE

Remata fulan janeiru Dom Bosco komunika ona ba salesianu no foin-sa’e sira katak la kleur tan misionariu dahuluk sira sei ba rai misaun iha Arjentina, no loron 5 fevereiru nia hakerek sirkular ofisiál, iha ne’ebé husu salesianu sira nia disponibilidade. Sira barak hatudu entusiazmu boot tebes. Maibé, sira ne’ebé katusa uitoan, hatudu sira-nia duvida: fatin ne’e dook, iha Italia loke ona uma barak, salesianu ne’ebé bele servisu uitoan de’it.

Maibé Dom Bosco hakarak katak misionariu dahuluk sira hatudu rekursu ne’ebé di’ak liu iha Kongregasaun. Entre sira hotu ne’ebé hatán ba Dom Bosco nia konvite, nia hili amlulik na’in 6 no koadiutor na’in 4. Nu’udar ulun espedisau nian Dom Bosco hili Giovanni Cagliero, ne’ebé Dom Bosco mehi, tinan barak liu ba, entre Indiu na’in rua. Ema hotu hakfodak tanba susar atu hanoin ba oratório lahó Cagliero: nia estuda teolojia, sai profesor ba frater sira, hanorin musika ho gostu boot, nia tuir problema ruma ne’ebé delikadu liu. Ema barak sente katak se nia ba, Kongregasaun iha Italia lakon boot. Maski Dom Bosco rona comentariu barak nune’e, nia deside atu hato’o ninia hanoin ba Cagliero. Loron ida, fulan marsu nian, Cagliero hamriik besik Dom Bosco ne’ebé nonok, hanesan ema distraidu. Dom Bosco dehan ba nia: “Ha’u hakarak haruka amlulik ida, ne’ebé “antigu” uitoan, atu akompaña misionariu sira ba Amerika. Nia bele hela iha ne’ebá fulan 3, to’o bainhira sira hetan fatin di’ak; husik sira mesak, iha fatin ne’ebé sira la hatene, lahó konselleiru ida, ha’u hanoin katak susar tebes”. Cagliero hatán: “Se Dom Bosco la hetan amlulik seluk, no ita hanoin katak ha’u bele hala’o knaar ida ne’e, ha’u prontu de’it”. Dom Bosco simu, hodi dehan: “Di’ak”. Liutiha fulan ruma, Dom Bosco la ko’alia tan kona-ba buat ne’e; maibé bainhira data atu ba besik ona, Dom Bosco hakbesik Cagliero no hateten: “Kona-ba atu ba Amerika, ó-nia hanoin hanesan nafatin? Keta karik ó halimar bainhira ó ko’alia”. Cagliero hatán: “Dom Bosco hatene katak ha’u nunka bosok ita”, Dom Bosco simu hodi dehan: “Di’ak, entaun prepara ó-nia sasán tanba tempu to’o ona”. Cagliero halai atu haloot nia sasán, entrega knaar ba kolega seluk no iha loron ruma nia laran, nia prontu ona atu ba. Ho ninia simplisidade nia hahú misaun ne’e no fulan tolu ne’ebé Dom Bosco hanoin katak nia tenke hela, sai fali tinan 30! Nia sai misionariu salesianu dahuluk no boot liu!



Pergunta atu halo oratorianu sira reflete:

- ⇒ Dom Bosco apresenta ninia presiza, maibé la obriga ema atu halo buat ne’ebé nia hakarak; Cagliero mak disponivel nafatin; keta karik iha ha’u-nia esperiênsia oratório nian, dala ruma ha’u rona katak iha presiza ruma: ha’u halo loos saida? Ha’u oferese an, hanesan Cagliero, ka ha’u subar an hodi hein katak ema seluk hatán?
- ⇒ Cagliero iha responsabilidade barak iha oratório, maibé la ta’uk atu husik buat hotu atu serbí ema seluk ho ninia tal-entu sira: ha’u fali? Oinsá ha’u uza ha’u-nia talentu sira no ba se? Ba ha’u-nia belun sira de’it ka, hanesan Amo Papa konvida, ha’u iha atensaun liuliu ba ki’ik no kiak sira?

JOGU: Ha’u oferese an ba rai misaun

Ho jogu ida ne’e ita hakarak tulun oratorianu sira atu hatene buat ruma kona-ba rai sira iha ne’ebé karik presiza haklaken evanjellu. Entre kontinente ida-idak, iha ne’ebé sei halo jogu ka atividade ruma, oratorianu sira bele dansa “Penguin dance” hodi “halo viajen” husi fatin ida ba fatin seluk. Se iha disponibilidade, bele uza mapa mundu nia no tau sinál iha nasaun ne’ebé temi.

AZIA: bainhira temi Azia ema barak hanoin ba kung fu ka artes marsiais. Iha jogu ida ne’e animadór sura to’o 3; bainhira dehan 3, oratorianu sira tenke metin iha pozisaun ida Kung Fu nian. Animadór sei koko atu halo sira hamnasa ka book an. Sira ne’ebé la metin hanesan estatua ida, sai husi jogu. Kontinua nune’e to’o bainhira hela ema ida de’it ne’ebé manan.

AMERIKA: Espedisaun misionaria dahuluk salesianu no salesiana sira mak to’o Amerika. Fahe oratorianu ba grupu ruma, grupu ida-idak sei apresenta drama kona-ba grupu dahuluk ne’ebé kumprimenta Dom Bosco no madre Mazzarello, hafoin ba rai misaun.

EUROPA: Fahe ororianu ba grupu, hafoin grupu ida-idak tuur hodi halo kabuar. Iha klaran tau lafatik ida ne'ebé taka ho hena; iha laran tau sasán oinoin 30 (lapizeira, kadeli, livriñu....). Bainhira jogu hahú animadór sei hasai hena no ororianu sira iha minutu 5 atu haree ho atensaun sasán sira iha lafatik laran. Liu tiha minutu 5, taka fali lafatik no fó surat tahan ba grupu ida-idak atu sira hakerek buat ne'ebé sira haree. Sira ne'ebé manán mak grupu ne'ebé hanoin hetan sasán barak liu.

AFRIKA: Ejiptu mak halo parte Afrika no iha Ejiptu, iha tempu antigüa nian, ema hari'i monumentu boot liu hodi duir fatuk sira. Fahe ororianu ba grupu (kada grupu ema na'in 5 ka na'in 10), grupu ida-idak sei hamriik halo fileira, tau besik sira fatuk 5 no dada liña iha rai kada metru ida. Ororianu ne'ebé hamriik iha fileira oin, tenke foti sae ain ida, no ho ida fali duir ba oin fatuk ida. Se nia monu ka tau ninia ain iha rai, nia sei para no kolega ne'ebé iha ninia kotuk kontinua duir fatuk husi pontu ne'ebé ida fali monu. Bainhira konsege atu lori fatuk ida liu husi liña ikus nian, kolega ida seluk hahú duir fatuk seluk; kontinua nune'e to'o bainhira grupu lori fatuk hotu liuhusi liña ikus.

OSEANIA: Australia mak rai boot liu ne'ebé halo parte Oseania no balada ne'ebé hetan iha Oseania de'it mak kanguru. Halo ororianu sira hamriik na'in 2 na'in 2; ida iha pasta ka plastiku ida ne'ebé tara iha ninia kakorok. Ororianu hotu book an hodi haksoit hanesan kanguru. Se halimar iha liur, ororianu ne'ebé laiha pasta, tenke hili ai-tahan maran (ida-idak) no tau iha nia kolega nia pasta laran. Se halimar iha uma laran, prepara billete kí'ik sira no fakar iha rai no ororianu sira tenke hili. Fó minutu 5 hafoin haree sira ne'ebé nia pasta todan liu.



Rosario misionariu

Liuhusi Rosariu ida ne'e, ita hakarak komprende no tama iha Kreda nia moris misionaria: ita sei reflete kona-ba atitude sira ne'ebé presiza hodi reza hamutuk ho Maria.

MISTÉRIU 1: Kontemplasaun

 Iha mistériu ida ne'e ita sei reflete kona-ba kontemplasaun hodi hateke ba Na'in Feto ne'ebé hananu ba Maromak.

L: Lk 1,46ss

G: Iha knananuk ida ne'e, Maria hanoin ba kiak sira, sira ne'ebé haraik an, sira ne'ebé hamlaha no ba salvasaun ne'ebé Maromak haraik ba sira hotu ne'ebé konfia iha Nia.na'in Feto sei tulun ita atu sai ema haraik an disponivel ba Maromak nia planu

Ita sei reza ba ema hotu ne'ebé hela iha Azia, kontinente iha ne'ebé hahú Maromak nia planu salvasaun nian. Iha Santa Maria nia fatin, se mak hakarak bele propoin intensaun orasaun nian

MISTÉRIU 2: Vokasaun Iha mistériu ida ne'e ita sei reflete kona-ba vokasaun no Maromak ne'ebé bolu sarani sira atu sai ida de'it.

L: Ef 4,1-3

G: S. Paulo fó hanoin ba sarani sira atu moris no serbisu hamutuk hodi evita liafuan mamuk sira ne'ebé haketak ema husi Na'i domin nian. Maria, iha komunidade sarani dahuluk sira, sai prezensa komuñaun no unidade nian.

Ita sei reza ba ema hotu ne'ebé hela iha Oseania, kontinente ne'ebé foin-sa'e liu, atu sira la ta'uk atu simu Maromak nia Liafuan. Hananu Ami Aman

MISTÉRIU 3: Responsabilidade

Iha mistériu ida ne'e ita sei reflete kona-ba responsabilidade ne'ebé mai husi prezente liberdade nian ne'ebé Maromak haraik mai ita.

L: Gal 5,1

G: S. Paolo hodi ko'alia kona-ba liberdade, konvida sarani sira atu moris didi'ak Rekonsiliaun. Se ita fó sasin kona-ba perdaun ne'ebé Maromak haraik mai ita, ita bele tulun ema seluk atu la moris tuir egoizmu maibé sente katak Maromak hadomi ema ida-idak.

Ita sei reza ba ema hotu ne'ebé hela iha Europa, kontinente iha ne'ebé sarani sira sai martir ba dala uluk. Sira-nia aten-barani konvida ita atu hili Jezús nafatin, hodi la buka ita-nia interesse pesoál. Iha Ave Maria nia fatin ita hananu: Maria ó 'be la'o hamutuk ha'u

MISTÉRIU 4: Karidade Iha mistériu ida ne'e ita sei reflete kona-ba karidade nu'udar Maromak prezente ba maluk sira.

L: 1Jo 2,9

G: Sira ne'ebé moris iha Espíritu, moris iha karidade. Ita la hatene Maromak no la bele haklaken Nia Evanjellu se ita la hadomi maluk sira Ita sei reza ba ema hotu ne'ebé hela iha Amerika, kontinente iha ne'ebé nasaun riku liu iha mundu no mós nasaun sira ne'ebé kiak liu, atu bele manán diferénsia sira ne'e hodi nakfilak an ba Evanjellu. Iha Santa Maria nia fatin solista reza: "Santa Maria, Maromak nia inan, hanorin mai ami atu moris iha karidade. Amen"

MISTÉRIU 5: Agradesimentu

Iha mistériu ida ne'e ita sei reflete kona-ba oinsá hato'o ita-nia agradesimentu ba Maromak tan nia laran-sadi'a.

L: Lk 15,1-7

G: Maromak buka ema atu oferese nia laran-sadi'a, Nia haksolok bainhira ema sala na'in hakotu atu husik nia moris aat. Ita la bele sai indiferente ba domin ida ne'e. Maria sei tulun ita atu moris iha damen no ksolok

Ita sei reza ba ema hotu ne'ebé hela iha Afrika, atu sira bele moris nu'udar ema ne'ebé hetan rekonsiliaun hodi haka'as an ba justisa no fraternidade.

G: ita remata ita-nia Rosariu hodi hananu Totus tuus Maria hodi saran ba Na'in Feto kontinente hotu, ema hotu nia hakaran atu buka ema hotu nia di'ak, liuliu ita-nia empeñu atu moris nu'udar sarani misionariu.

